

दिनांक : 09.02.2026

समय : 18.45 बजे

- प्रधानमंत्री नरेन्द्र मोदी 'परीक्षा पे चर्चा' कार्यक्रम मांय विद्यार्थियों ने कामयाबी हासिल करण सारु अनुशासित रेहवण री सीख दीनी।
- मुख्यमंत्री भजन लाल शर्मा राजस्थान री ज़मीं अर आयुर्वेद रो ऐतिहासिक अर गहरो रिश्तो बतायो।
- प्रधानमंत्री आवास योजना शहरी रा तैत देश भर मांय एक करोड़ 12 लाख मकान बणावण री मंजूरी दीरीजी।
- स्कूल शिक्षा विभाग री ज़िला एकेडमिक रैंकिंग रा तैत जनवरी मांय झुंझुनूं अर हनुमानगढ़ ज़िला अब्बल रहया।

0000

प्रधानमंत्री नरेन्द्र मोदी 'परीक्षा पे चर्चा' कार्यक्रम रा 9वां संस्करण रा दूजा दौर मांय विद्यार्थियों सागे बातचीत कीनी। आज जारी करी ज्या वीडियो मांय वे परीक्षा रे दौरान तनाव अर चिंता कम करण रा बारा मांय बातचीत कीनी। श्री मोदी विद्यार्थियों ने परीक्षावां ऊं आगे देखण अर जीवन कौशल, खेल, रचनात्मकता अर खुद माथे भरोसो राखण री सीख दीनी। प्रधानमंत्री मोदी कामयाबी हासिल करण सारु अनुशासन री ज़रुरत माथे ज़ोर दीनो।

0000

प्रधानमंत्री नरेन्द्र मोदी अफ्रीकी देश सेशेल्स सारु साढ़े 17 करोड़ डॉलर रा खास माली पैकेज रो ऐलाण कीनो है। नई दिल्ली मांय सेशेल्स रा राष्ट्रपति डॉ. पैट्रिक एरमीनी सागे मुलाकात पाछे खबरनवीसां सागे बातचीत करता थकां श्री मोदी कह्यो के भारत अर सेशेल्स स्वास्थ्य, मौसम विज्ञान, इलेक्ट्रॉनिक्स अर सूचना प्रौद्योगिकी अर सुशासन समेत न्यारा-न्यारा हलकां ऊं जुड़या 7 करार माथे सही कीनी है।

0000

मुख्यमंत्री भजनलाल शर्मा कह्यो है के राष्ट्रीय आयुर्वेद संस्थान, भारत रा ईलाज ऊं जुड़या जूना ज्ञान अर नुवा वैज्ञानिक अनुसंधान ने जोड़े है। श्री शर्मा आज जयपुर रा राष्ट्रीय आयुर्वेद संस्थान रा स्वर्ण जयंती समारोह मांय बोल रहया हा। मुख्यमंत्री कह्यो के ई संस्थान रा 50 साल जन-स्वास्थ्य रा प्रति अटूट सेवा अर शोध री सोच रो नतीजो है। श्री शर्मा कह्यो के राजस्थान री ज़मीं रो आयुर्वेद सागे ऐतिहासिक अर गहरो नातो रह्यो है।

.....

जळसा मांय केंद्रीय आयुष राज्य मंत्री प्रतापराव जाधव कह्यो के प्रधानमंत्री नरेंद्र मोदी री अगुवाई मांय ईलाज रा आयुष तरीका ने देश रा स्वास्थ्य ढांचा मांय मजबूती सागे जोड़ी ज्यो है।

.....

वे भरोसो जतायो के ओ संस्थान आवता बगत मांय 'हील इन इंडिया' री सोच रा तैत एक वैश्विक केंद्र रा तौर ऊं सामी आवेला। कार्यक्रम मांय उपमुख्यमंत्री प्रेमचंद बैरवा समेत आयुष मंत्रालय रा केई अहलकार ई मौजूद हा।

000

प्रधानमंत्री आवास योजना शहरी रा तैत देश भर मांय एक करोड़ 12 लाख मकान बणावण री मंजूरी दी जा चुकी है। आवास अर शहरी कार्य मंत्री मनोहर लाल आज राज्यसभा मांय प्रश्नकाल रे दौरान आ जाणकारी दीनी। वे कह्यो के योजना रा तैत 9 लाख ऊं बत्ता मकान दिया जा चुक्या है। वे सदन ने बतायो के ई योजना रा दूजा दौर रा तैत शहरी प्रवासियां अर औद्योगिक मजूरां सारु किफायती रेट माथे भाड़ा रा मकान री व्यवस्था सरु करी ज्यी है।

000

स्कूल शिक्षा विभाग कानी ऊं जनवरी महीना सारु जारी करी ज्यी ज़िला एकेडमिक रैंकिंग मांय झुंझुनूं अर हनुमानगढ़ अब्बल रहया है। विभाग रा शासन सचिव कृष्ण कुणाल बतायो के आ रैंकिंग ज़िलां री प्रशासनिक दक्षता सागे खास तौर ऊं लर्निंग आउटकम्स माथे आधारित है। इण मांय विद्यार्थियों री हाज़िरी, बोर्ड परीक्षा रा नतीजां अर अहलकारां कानी ऊं मौका मुआयना ने खास तौर ऊं ध्यान राखी ज्या। शिक्षा मंत्री मदन दिलावर रैंकिंग रा ई तरीका री सराहवणा करता थकां कह्यो

के इण ऊं स्कूल शिक्षा व्यवस्था मांय साफगोई अर जवाबदेही मजबूत बणी है। वे कह्यो के सरकार हर विद्यार्थी री असल प्रगति तैय करण अर प्रदेश रा सगळा ज़िलां मांय चोखी भणाई-लिखाई रा बराबर मौका मुहैया करावण माथे खास ध्यान दे रही है।

000

मुख्य सचिव वी. श्रीनिवास कह्यो है के "डिजिटल अरेस्ट" सरीखा साइबर अपराधां माथे काबू करण सारू मोटा पैमाना माथे प्रचार-प्रसार अर आमजन मांय जाग जगावण री ज़रूरत है। मुख्य सचिव आज साइबर अपराध नियंत्रण ऊं जुड़ी समीक्षा बैठक मांय बोल रह्या हा।

वे राज्य विधि विज्ञान प्रयोगशाला री भांत क्षेत्रीय प्रयोगशालावां मांय ई साइबर सेल बणावण रो काम बेगो ई पूरो करण रा हुकम दीना। मुख्य सचिव बैंकां अर दूरसंचार सेवा देवण वाळां सागे तालमेल बधा र शंका वाळा खातां री निगराणी अर एआई आधारित तकनीकां ने असरदार तरीका ऊं काम लेवण माथे जोर दीनो।

0000

पुलिस महानिदेशक राजीव शर्मा कह्यो है के पीड़ित लोगां ने तुरत न्याय दिरावण माथे पुलिस रो खास ध्यान है। वे आज भीलवाड़ा मांय अजमेर रेंज री अपराध समीक्षा बैठक मांय बोल रह्या हा। डीजीपी अहलकारां ने मामलां माथे लगातार निजर राखण अर संगीन अपराधां रा मामलां मांय संवेदनशीलता सागे करड़ी कार्रवाई करण रा हुकम दीना। पुलिस महानिदेशक निगराणी राखण रा काम मांय जवाबदेही, मामलां रा टेमसर निपटारा करण अर साइबर अपराधां माथे लगाम लगावण माथे खास जोर दीनो। इण ऊं पैली वे पुलिस लाईन मांय राख्यी ज्यी संपर्क सभा रा तैत जवानां सागे बातचीत कीनी। मीटिंग मांय एडीजी वी.के. सिंह अर अजमेर रेंज रा आईजी राजेंद्र सिंह समेत पुलिस रा केई आला अहलकार मौजूद हा।

0000

जयपुर मांय आज राज्य स्तर रो वन मेळो सरू व्ह्यो। दो दिन रा ई मेळा रो वन मंत्री संजय शर्मा उदघाटन कीनो। ई मोके वे न्यारी-न्यारी दुकानां माथे बतायी ज्या सामान अर जड़ी-बूटियां देखी। वे कह्यो के जंगलात हलका ने बचावण सारू वठे रा रेहवासियां ने काम-धंधा ऊं जोड़नो ज़रुरी है।

000

गृह राज्य मंत्री जवाहर सिंह बेढ़म आज डीग ज़िला रा आदिबद्री धाम मांय पीवण रा पाणी री मोटी परियोजना रा काम री नींव रखी। करीब 65 लाख रुप्या रा खर्च वाळी ई योजना रा तैत अलीपुर मांय एक लाख लीटर बूता री पाणी री टंकी बणायी जावेला अर ट्यूबवेल खोदयो जावेला। श्री बेढ़म अहलकारां ने आ परियोजना तय छह माह री ठोड़ अढ़ाई महीना मांय ई पूरी करण रा हुकम दीना, ताकि उनाळा मांय जातरूआं अर वठे रा रेहवासियां ने पीवण रो साफ पाणी मिल सके।

000

उपमुख्यमंत्री और वित्त मंत्री दीया कुमारी 11 फरवरी ने विधानसभा मांय राज्य रो माली साल 2026-27 रो बजट पेश करेला। जनता ने राज्य रा बजट ऊं घणी उम्मीदां है। हनुमानगढ़ रा शिक्षाविद् रोहिताश चुघ बजट मांय ज़िला मांय बुनियादी ढांचा विकास अर खेती-बाड़ी सारू खास प्रस्तावां री आस जतायी।

000

प्रधानमंत्री स्वनिधि योजना रा तैत कर्ज देवण रा मामला मांय कोटा ज़िलो राज्य मांय अक्ल रह्यो है। ज़िला रा गळी-कूचां मांय सामान बेचण वाळा 16 हज़ार ऊं बत्ता लोगां ने हाल ताई 35 करोड़ 16 लाख रुप्या रा कर्ज दिया जा चुक्या है। योजना रा प्रबंधक प्रदीप जोशी बतायो के शहरी हलका मांय स्ट्रीट वेंडर्स ने माली संबल देवण सारू कर्ज देवण रा खास शिविर लगाया जा रह्या है।

0000

बांसवाड़ा ज़िला मांय प्रधानमंत्री सुरक्षित मातृत्व अभियान रा तैत खास स्वास्थ्य शिविर लगायी ज्या। मुख्य चिकित्सा अर स्वास्थ्य अधिकारी डॉ. खुशपाल सिंह बतायो के शिविरां मांय आस वाळी लुगाइयां रा स्वास्थ्य री मुफ्त जांच करी ज्यी अर वां ने 'मां वाउचर योजना' रा तैत सोनोग्राफी कूपन दिया ज्या। ई अभियान रो मकसद पोषण रा बारा मांय राय देवण अर नियमित जांच रे जरिये मायड़ा री मौत री रेट मांय कमी लावणो है। पाली ज़िला मांय सोजत रा सरकारी अस्पताल मांय ई आस वाळी लुगाइयां सारू मुफ्त जांच शिवर लगायी ज्यो।

000